

I hob Sushi b'stellt

I ruaf o -
(acht - oans - oans - drei - drei - zwoa)
der „Call-a-Sushi-Service“ frogt mi: Wer is dro?

I sag eahm, wer und wo i bin
und ois, wos i so hob im Sinn:
I mecht an g'mischt'n Sushi-Teller
und wenn's geht, a bisserl schneller

Weil i hock grad vor meim TV
und momentan läuft d'Tagesschau
Danach kummt „Wunder der Natur“
und da passt Sushi guat dazua

Der Service sagt: Des hama glei
I schick an Sushi-Mo vorbei
Die Entfernung is ned groß

und der Sushi-Mo, und der Sushi-Mo, und der Sushi-Mo
der fahrt glei los

I hob Sushi b'stellt - Lalalalala
I hob Sushi b'stellt - Lalalalala

Und i wart -
(zwanz'g - dreiß'g - vierz'g - fuchz'g Minut'n)
und mei Mag'n knurrt scho - des is wirklich hart!

Wann is es jetzt endlich soweit?
I hob mi so aufs „Sushin“ g'freit
I ruaf beim Sushi-Service o:
Hey Leit, wo bleibt der guade Mo?

Dort sag'ns, er is nei in der Stadt
und dass er si verfahr'n hat
Er spricht koa deitsch, kennt si ned aus
und is normal in Japan z'haus

I lieg vorm Fernseher auf der Matt'n
und hätt so gern a Sushi-Platt'n
und dazua a kühles Bier

Doch der blede Depp, doch der blede Depp, doch der blede Depp
find ned zu mir

I hob Sushi b'stellt - Lalalalala
I hob Sushi b'stellt - Lalalalala

Und i dram -
(yin - yang - yung - tsching - tschang - tschung)
dass i weit weit weg wär - fern von mir dahoam

I leb in Japan irgendwo
Des schaut so aus wie Tokio
I hob a G'schäft dort, des ma kennt
und des si „Call-a-Schweinsbrod'n“ nennt

Und ständig leit mei Telefon:
„Ich wa'ten lang auf Schweinsbladn schon!“
Doch weil i koa japanisch ko
kommt a der Schweinsbrod'n dort nie o

I fahr verzweifelt durch die Stadt
und hob die Suacharei so satt
Kenn mi hint und vorn ned aus

Und i wui nur z'ruck, und i wui nur z'ruck, und i wui nur z'ruck
zu mir nach Haus

Er hod Schweinsbrod'n b'stellt - Lalalalala
I hob Sushi b'stellt - Lalalalala

I wach auf -
(ding - dong - ding - dong - ding - dong)
weil mei Wohnungsglock'n reißt mi ausm Schlaf

Bin schweißgebadet von meim Dram
Mei, bin i froh - i bin dahoam
Der Sushi-Mo steht vor der Tür
und eahm geht's ganz genau wie mir

Voi schweißgebadet steht er do
I biet a kühles Bier eahm o
Und i sag: Ja, komm doch nei

und dann lad i di, und dann lad i di, und dann lad i di
zum Sushi ei

Weil i hob Sushi b'stellt - Lalalalala
Ja, i hob Sushi b'stellt - Lalalalala

Text und Musik:
Michael Bohlmann
10 / 2000